

## Grietje Kammler is nu de Baas van dat Plattdüütskbüro

AURICH / OFL – De Fackstee för de Regionaalspraak, dat Plattdüütskbüro van de Oostfreeske Landskupp, arbeidt siet de 1. Juli unner en neei Leid: Grietje Kammler hett de Upgaven van Cornelia Nath (60) overnohmen. Froo Nath hett de Inrichten vör mehr as 20 Jahr mit upboot un is Enn Juni mit en Fier in hör Vörruhestand entlaten worden.

De Spraakwetenskuppenske Grietje Kammler is in Emden up de Welt komen un hett sük tegen 43 Mitbewarvers dörsett. In Tokummst sall se sük, so as Landskuppspräsident Helmut Collmann seggt, „mit Swung“ um de verscheden Projekten rund um de plattdüütske Spraak kümmern. Daarto hören unner annern dat plattdüütske Internett-Woordenbook netso as de Plattdüütskmaant, de instüsken regionaal neet mehr wegtodenken is un in elke September Plattdüütsk in de Middelpunkt haalt. Butendeem will Grietje Kammler wiederhen de Tweesprakigheid in Kinnergaarns un Grundscholen vöranbringen un sük ok um dat Saterfreeske kümmern.

De 29-jährige seggt en Verännern in dat Ansehn van Plattdüütsk vörut: In en Welt, de immer mehr tosamewasst, is de Spraak weer een Maneer för Individualisierung un Identifizierung, see se de Vertreders van de Medien.

Bi de Vörstellen van de Germanistin meen Landskuppsdirektor Dr. Rolf Bärenfänger, dat en Weerbesetten van dat Leid van de Fackstee nooit in Fraag stahn harr.

Grietje Kammler is mit Plattdüütsk upwussen, will dat aber in Tokummst gern noch wat flotter proten könen.



Foto: Former, OFL